



P R Æ F A T I O.



ACULTAS Medica Parisiensis curaverat olim Codicem Medicamentarium instituere, vulgareque Typis, ne ab ipsis-met Morborum præsiidiis suscitarentur Morborum discrimina. Tunc enim ad cujusque Pharmacopœi arbitrium conflata Medicamina, spurix fiebant virtutis, incertæ potentiæ, plenaque periculis. Civibus hæc impendentia mala diu nec infelicitè averterat Codex ille Medicamentarius; Apotheca purgata inutilibus, necessariis ornata, undè nec intuta, nec invalida corporum saluti depromebantur auxilia. Verùm temporum lapsu rarior, crescente Medicinâ brevior Codex Medicamentarius, & ad Prælum revocandus & amplificandus erat. Reverà amplior in dies naturalis Historiæ cognitio, solertior rei Pharmaceuticæ tractatio, facem præferente Physicâ experimentali, uberrimam reconcinnando Codici suppeditavêre materiem. Sed cum hisce temporibus eò res pervenerit, ut non è Galenico tantùm, sed & è Chymico fonte salutaria hauriantur præsiidia, Galenicis Chymica subjunximus Remedia, quæ licet parùm inter se discrepent præparandi modo, distinctis tamen capitibus vitandæ confusionis causâ, tracta-

* ij

P R Æ F A T I O .

vimus. Ergo in explorandis, comparandis, perpendendisve optimis utriûsque Pharmaciae voluminibus diù multùmque sudatum est, undè quidquid, sive ad Medicamentorum delectum justamque proportionem, sive ad processûs elegantiam pertinet, curiosè seligeretur. Medicamenta quidem Galenica, quorum mitior est indoles & diuturniori usu comprobata virtus, non ità difficulter admissa sunt; in his tamen plura addita fuere, quædam rejecta, plurima mutata in melius. Chymica verò remedia, quæ eò sunt verenda magis, quò majori pollent energiâ, antequam præscriberentur, maturè pensitata sunt, expensa diligenter, scrupulosè mitigata, ne si ruditer, imperitè aut negligenter tractarentur, nativæ viscerum mollicudini sæviùs inimicarentur. Nec etiam omissæ sunt, imò operis in ipso limine proferuntur variæ illæ Encheireses quibus præparari indigent nonnulla medicamenta, ut præstantiora, vel ad utendum, vel ad componendum evadant. In operis dispositione, Galenica Medicamenta solitum retinuerunt ordinem, demendo tamen Aquas stillatitias simplices, quas Chymici juris ac Domini, Chymia restitui voluimus. Porrò in exponendis distillationibus Aquarum, & Plantis, & earum partibus, pro variis earum odore, sapore, substantiâ, varios quibus sincera illarum elicetur virtus, experti assignavimus destillandi modos. Nec dissimili ratione cum cæteris Chymia operationibus actum est. Illis enim peculiare assignatæ fuerunt Classes, sub quarum nominibus

P R Æ F A T I O:

traditi sunt remediorum Chymicorum processus ; ut scilicet sub uno eodemque intuitu, remedii cujusslibet natura simul & origo indicaretur, tum etiam ut ità collectis ejusdem generis operationibus, variæ pro corporum diversitate procedendi rationes statim intelligerentur, sicque perfecta, licet compendiosa haberetur universæ Chymix cognitio. De vocibus Chymicis & remediorum dosibus, diù multùmque agitatam est, nùm vulgaribus exprimerentur Litteris, nùm propriis characteribus designarentur; tutius visum est expressa scribere verba, quam fallacibus sæpè deformatas figuris voces interpretari, ut Lectoribus quid legendum, artificibus quid exequendum habeant, clarum perspectumque fiat. Sed ne ullus in Medicamentorum delectu errori daretur locus, neve fucum facerent variæ simplicium species, quæ licet ejusdem sint generis & nominis, diversas tamen obtinent proprietates, genuina ordine Alphabetico præmittere visum est discernicula rerum, quæ ex Vegetabilium, Animalium & Mineralium familiis depromptæ, vel Codicis hujus compositiones, vel Magistrales formulas ingrediuntur. Demum ut per totum opus dispersæ res suo quæque loco positæ facilè reperirentur, additis indicibus & rerum & capitum necessariis, legentis commodo consultum est. Interim quærat hîc nemo promptuarium universale; operis hujus præcipua cura versatur, ut in tantâ quanta est remediorum multitudine, utiliora tantùm & usitatiora proponerentur. Sed cum Orbis universi ve-

P R Æ F A T I O.

luti confluxum sit Lutetia, dum pro Civibus plurimæ conscriptæ sunt formulæ, plura Exteris familiaria non omiſſa fuere præſidia, quæ in officinis Pariſienſibus præſto eſſe convenit, ne in reſtituendâ ſanitate curta videatur Lutetia peregrinantibus. Hæc ut opera feliciter conſummarentur, laboris penſa ſelectis Doctõribus diſtributa ſunt, qui mutua inter ſe conferendo ſtudia, communesque impendendo labores, ſuas miſcerent operas, ſua commodarent conſilia. In frequentibus Facultatis Comitiis propoſita res eſt ac trutinata. Singulorum Doctõrum animadverſiones, lituræ, mutationes, additamenta in medium prolata ſunt & examinata. Illud unum ſupererat, ut meditati à Facultate Medicaminum componendorum modi ad ſolertem Artificis manum (fidum nec indubitabile criterium) revocarentur. Hoc conſilio, in tractandis medicaminibus expertiſſimos ad opus invitavit Facultas Pharmacopœos Pariſienſes, qui præſcriptas ab ordine ſaluberrimo remediorum conficiendorum rationes feliciter ſuccedere, operationibus diligentiffimè repetitis, experti ſunt. Sic igitur ſeriò meditarum, perfectiùs elaboratum, ab omnibus Galliæ Medicis & Pharmacopœis exoptatum, Exteris fortè non injucundum hoc opus, omnium conſenſu prodit, ægrotantibus ſecuritatem, Medicis certitudinem, Pharmacopœis conſtantem regulam & legem allaturum.

